

## SONDERPREIS: Was wäre wenn?

Emily Schönegger, HTBLuVA Salzburg

Uff, a Textwettbewerb und no dazua soll a si mit der Technik ausanondasetzen. Mhhh, wie fong i do jetzt woi am besten on? Und was bedeuten die Fochbegriffe überhaupt? I moan Baugruppe, Energieausweis, ... is kloar, was des hoaßt. Dampfbremse, des hom mir heite in der Online-BKT-Stunde scho besprochen. Des hot jo was mit dem sd-Wert zum tuan und mit dem, dass a Bauwerk von innen nach außen immer diffusionsoffener sei muaß. Okay, ober was zum Teifi bedeutet Speckgürtel? Für was braucht man an Speckgürtel? I glaub ned, dass irgendwer sie mit an Gürtel dicker mochen mechat. Vielleicht sollt i amoi googlen, was des hoaßt? Ok, do steht: Speckgürtel sand anscheinend „suburbane Siedlungen in der Umgebung einer Stadt“. Jetzt bin i wieder a bissi schlauer worden! Was stehngan denn sonst no so für Wörter auf dem Info-Zettel? Mobilität. Wenn i des Wort hear, donn denk i dabei glei an Autos. Ober eigentlich steckt no so vü mehr hinter dem Wort. Mobilität gibt's jo scho seit Urzeiten. Früher, wias zum Beispiel no mit Kutschen gereist sand, do hams sie jo die Pferdln mit Kroftfuata gfuatert, und die Pferdln hobm zogen und de Radln hobm sie draht. De Mobilität is aus unsam heitigen Alltag jo goa neama wegzudenken, owa dass Mobilität so stork mitn Kroftstoffverbrauch zusommenhängt, is ma irgendwie erst jetzt so richtig bewusst worden. I hob mi davor scho gfrogt, warum des Wort am Zettl oben steht, owa jetzt erscheint's ma irgendwie logisch. Ohne Technik täts koa Kutschn geben, koane Autos, koane Flugzeuge und es würd a koa Mobilität geben. Owa die Unmengen an Kohlendioxyd, die mia beim Verbrennen vom Öl freisetzen, tuan weder an Klima no uns wirklich guad. An dem soitat ma wirklich was ändern. Sunst wird's füa die Menschheit a Belastungsprobe, weil's durch des Kohlendioxyd, des beim Verbrennen vom Kroftstoff entsteht, auf unserm Planeten oanfoch zworm wiad. Mit der heitigen Technik kennt ma was erfinden, damit ma klimaneutral und trotzdem mobil sand. Elektrofahrzeuge siagt ma jetzt jo eh immer öfter. Was warad, wenn ma den Strom dafür nur no aus der Sonnenenergie erzeugen würden? Darat de E-Mobilität donn beliebter werden? Auf olle Fälle warat a erster Schritt, um a wirklich was am Klimawondel zu ändern, de Mobilität auf E-Autos umzustöhn.